

駐

粵

八

旗

志

駐粵八旗志卷十六目錄

人物志

滿洲八旗歷任協領列傳

吉隆阿

蘇和臣

舒敏

五十八

達綳阿

六十

關靈

布庫

珠隆阿

善福

伊清阿

瑪克什布

達春泰

松福

廣德

文明

達興阿

烏郎阿

倭陞額

關祥

文達

阿勒精阿

喀勒春

格綳額

舒倫

承聯

承惠

光緒十年續修滿洲協領列傳

伊勒哈春

駐粵八旗志卷十六

吉隆阿滿洲鑲黃正白旗協領乾隆二十三年由
京旗叅領來粵駐防掌理將軍印務兼理右司事
務代易之始百度維新均能揆度時勢悉臻妥協
將軍福增格特倚任之先是廣州八旗官兵歿後
五載一次運柩回京安葬及至滿漢合駐因運柩
維艱奉

旨著在駐防官地安葬以便祭掃二十一年九月署將軍
李侍堯特委吉隆阿偕漢軍協領舒九思擇地爲
旗塋後於大東門外勘得蟠松嶺駟馬岡官路東
碑亭西碑亭等處無稅官地約八十九畝零堪作

旗塋請移知督撫立案俾免爭訟殫心經畫凡兩載地界始定滿漢八旗沐生順死安之惠焉

蘇和臣滿洲正黃旗人乾隆二十一年由鑾儀衛整儀尉奉撥駐粵任正黃正紅旗滿洲協領蒞事精詳政尙嚴厲乾隆三十二年雲南解馬之役將軍容保委令領頭隊正馬百八十七匹於十月旣望管押啟行沿途調備芻茭棚槽糗料不勝勞苦厯逾關索嶺果子園諸險隘風雨連綿人畜半染瘴癘跋涉兩月甫達永昌大營而行營監紀官以馬匹瘠弱額數未足責令醫治填償羈留半載後值緬酋畏威乞降督師大學士傅文忠恆憫其勤

苦遂給文回廣勤恪供職終於任

舒敏滿洲正藍旗人精通滿文善騎射乾隆二十一年來粵駐防任鑲白正藍旗滿洲協領深慮滿人在粵漸染漢人習氣力加整飭衣食違式者有禁言語文字訛誤者有禁蒞事公所問答必操清語傳單必書滿字旗風由是純固厯任將軍副都統咸禮敬之尤精音韻之學嘗從清書十二字頭悟出九音七韻之術惜不留著述後遂無通其說者

五十八滿洲鑲紅旗人由健銳營前鋒起家乾隆二十一年奉撥駐粵擢任鑲紅鑲藍旗協領九月

率眾至羊城一切布置因時制宜明年大局粗定
整飭操防護立前鋒營演習公所擇古仁王寺觀
音堂左爲較塲夢覺禪林爲訓練公所選勁卒二
百朝夕教以踰跂騙馬等技藝出重價購善馬使
習驅馳故前鋒營之馬射至今尙守其傳日坐夢
覺禪林西廳督策兵士公事稿案咸於此批發與
士卒親同一本旗務視同家事人不能欺亦不忍
欺焉二十三年因病解官挈眷回都

達綳阿滿洲鑲紅旗人奉撥駐防廣州後由佐領
陞任鑲紅鑲藍旗協領恪守旗制勿許忘本每歲
仲春仲秋應令滿漢兵登東西歸德三處城樓吹

演海螺每日三次所以警兵眾豫備開操也厥後漸廢此制乃稟諸將軍以爲此關東行獵巡衛邊防先期一月招集各屯行狩獵馬及隨圍士卒舊典也廣州瀕海雖無屯卒牧馬然

國俗不可不知請仍令復之偶閱馬射有甲士甫縱轡卽顛撲墜地左右曰此外郎文士未嫻馳驅怒曰文士卽不能乘騎耶旗人自幼讀書習騎射文武兩途不容偏廢嗣後凡不能騎射者卽行革退由是旗營文士無不習騎射者在任六年訓兵最爲有方

六十滿洲鑲紅旗人乾隆二十三年由天津挈眷

赴廣州駐防任鑲紅旗佐領時新舊交代安插分派以及操防諸事盡心籌度務令妥協上憲嘉之二十八年陞補鑲紅鑲藍旗協領省垣遭颶風兵房多倒塌籌款興修不遺餘力性剛方不隨流俗將軍明福深重其品令掌左司關防政務恪遵舊制惟步射不取四平大架之說曰步射之法前手全在封衝後手全在夾逼始能命中若後肘方平開展徒美觀耳烏能中的其射法號稱京樣滿營中至今猶有傳之者在職九載廉敬辦公兵眾敬而愛之後卒於任

關靈滿洲鑲紅旗人少時在京爲繙譯房外郎擢

木旗委叅領掌理滿文章奏兼通蒙古漢文來廣
後充印務章京乾隆三十八年陞授鑲紅鑲藍旗
滿洲協領先以駐防旗人滿文生疏於章疏稿案
時有訛謬所關匪淺遵照署將軍李侍堯設立兩
翼清書官學敎訓滿漢俊秀子弟每旗限以五人
專心學習擇滿文嫻悉者每翼二名專司課讀立
定學規課程每日先講授

聖諭廣訓四書五經及日報邸鈔下午令二人以滿話互
相問答月課繙譯文字分別獎賞未兩載考取筆
帖式及隨印外郎者咸出兩學之內授受相傳至
道光二十七年駐防開考繙譯童試鄉會試俱號

稱得人云

布庫滿洲正紅旗人原在天津戍守海防官本旗
甲喇章京乾隆二十年奉

旨調京旗滿洲兵千五百員名挈眷赴廣州滿漢合駐二
十一年第一起滿兵到廣二十三年二十四年第二
起第三起滿兵到廣前後共到五百名不敷操
防三十年第四起另戶滿兵二百五十名到廣三
十一年第五起另戶滿兵二百五十名到廣京旗
難再抽調三十二年乃調天津滿兵五百名陸續
到廣以足一千五百名定額故布庫到廣最後旋
由正紅旗佐領陞任正黃正紅旗協領少時力學

通滿漢文又生長津門嫻熟海疆防守事宜恆慮
滿漢八旗新舊相參易生嫌隙乃諭其下曰漢軍
本關東舊部入關後南收吳楚北定晉秦其功甚
鉅故

列聖於滿蒙漢旗僕一視同仁切不可自生矛盾也眾服
其教由是互相親愛生平忠厚遇事和解大都類
此年逾七旬卒於官

珠隆阿滿洲鑲白旗人由驍騎校充印務章京屢
因稿案事件被上官詰責退而憤懣其師穆格教
之曰律例熟旗務明斯幹吏矣歸購中樞政考八
旗事宜朝夕講誦未一載遂爲寅僚所佩服厯居

要職乾隆四十五年任鑲黃正白旗滿洲協領爲滿營領袖五十三年新疆平逆回家屬充發廣州與甲兵爲奴者男婦幾二百人類皆狼子野心以鬪殺逃亡爲家主累者甚眾乃爲設法約束恩威並濟咸令得所由是不復犯法焉是時因征兩金川以雲梯得力奉

旨令駐防旗兵演習雲梯將軍福昌委令總理其事乃於城北擇曠閑之地築堅礮造雲梯配兵三百演成進退陣式皆能迅疾如飛上憲深相嘉獎焉在職二十八載乃卒

善福滿洲鑲紅旗人乾隆四十二年廣州滿洲鑲

紅鑲藍旗協領缺出乏員選補善福由京旗佐領
陞補斯缺次年秋抵粵任事每公堂蒞政必用清
語將軍宗室永瑋命掌兩翼清書官學告諸生曰
爾等學習滿漢文字縱能精工乃一藝之長耳務
須勤習經史博古通今成有用之學武爲良將文
號名臣庶不虛此攻苦也後值歲大饑倉儲弗繼
稟請將軍暫挪右司地租閒款每兵借給二兩以
濟急需計月扣還各旗效之旗兵不至艱窘其他
仁政頗多後數載乞休返京

伊清阿鑲白正藍旗滿洲協領驍勇善射治兵最
嚴而愛好文才見兵士之通繙譯曉漢文者必優

禮之曰此才俊之人既能明理必能辦事非武夫可比也乾隆五十二年臺灣之役自請於將軍存泰願充頭敵將軍素知其才具穩練足以勝任於是派領滿洲官兵之半及前鋒營銳卒爲頭隊首先啟行由鹿仔港先達彰化後隨參贊海蘭察攻八卦山大里棧剿盪虎仔溪萬丹庄等處咸在事出力迨林逆就擒於五十三年四月凱撤回廣是年十月奉部文伊清阿記名候陞兵眾賞賚有差陣亡者優恤後數載卒於任

瑪克什布鑲紅鑲藍旗滿洲協領掌理左司關防乾隆五十二年臺灣林爽文之亂奉派分帶滿營

官兵六百五十員名隨副都統博清額渡臺征討
七月初八日帶領第二起征兵由東江啟行舟抵
鹿仔港進屯彰化縣以待大兵齊集分五隊應援
諸羅十一月初六日隨博清額帶領滿兵及屯練
義勇直搗崙仔尾賊寨斬獲多匪次日窮追逃散
之賊酉刻方抵縣城鎮將柴大紀踴躍出迎次日
聞賊逃往水沙連乃稟明博清額令降人引路領
銳卒越大溪窮其入山之路槍斃山梁執旗賊目
奪獲牛羊糧食車輛甚多得賞功牌記名錄用遂
留屯諸羅盡力搜捕逆黨不留根株而於被獲之
婦女幼孩囑令縣官安置撫養存活者亦無算凱

撤後以軍功記名候陞未幾病卒

達春泰滿洲正藍旗人乾隆五十二年以防禦從征臺灣首告奮勇翼長命爲前驅抵臺之日奉令哨探離大營不數里見岡西大林中有賊十餘人挺矛逐一採樵軍視之乃與其有夙憾者迫切閤引弓連射斃兩賊採樵軍得脫匍伏於前謝其忘憾拯救之恩答曰今日之事君事也豈以私憾廢公義乎眾聞之咸大悅服每戰必陷陣退必殿軍前後南北路十餘仗皆有斬獲凱撤後補正白旗佐領五十四年陞鑲紅鑲藍旗協領每大隊合操策馬捉刀如臨大敵勤訓練整戎伍一時稱最協

領署近南海學宮嚴禁旗人不得牽馬入牧兒童
不得入內喧擾時有南海蘇青鰲孝廉在學宮內
尊經閣講學與之訂交甚相敬愛云

松福滿洲鑲白旗人乾隆五十二年由防禦從征
臺灣領隊居大營之右旗兵赴支應廠領口糧與
管糧人役爭訐眾譁然謂有減扣松福聞之急赴
廠彈壓因謂委員曰按例軍行口糧每兵日給八
合三鈔但按數給足必不至生事若扣減少許必
受其禍諸君何勿再思行之糧臺由是改轍各營
益帖然隨隊進剿屢著戰功凱旋陞補佐領五十
七年擢任鑲白正藍旗滿洲協領掌管右司印鑰

於庫款支收細數自具手冊登記嘉慶七年惠州會匪倡亂將軍書敬奉

旨速領旗兵往援八旗點派兵丁咸選擇壯健少年惟松

福所選者皆循謹老成之士眾怪問之曰鼠竊草寇官吏釀之成亂耳大軍前臨輒鳥獸散矣何待攻戰吾慮少年氣盛或反滋擾良民也後果如所料在職三十餘載年逾七旬引年乞休以軍功得食全俸家居訓子孫十四年將軍明俊盤查右司庫款數目微有不符盤詰司員至於再四皆未能明或告以請教松協領因往詢之曰衰齡健忘有昔年手記小冊在請稽之眾閱其冊四十載收支

之數絲毫必記燦如列眉按冊覈算其案乃白卒
後長子達興阿官正黃正紅旗協領次子烏郎阿
官鑲黃正白旗協領孫舒倫官正黃正紅旗協領
曾孫伊勒哈春今官鑲白正藍旗協領一門貴盛
四世弗衰滿洲八旗中惟協領廣德家堪媲美云
廣德滿洲正白旗人乾隆五十二年由前鋒從征
臺灣有戰功次年凱旋補鑲黃旗驍騎校操練卒
伍恆以身率然性情剛果與上官弗協未幾解職
乃奮志讀書足不越閭者數年上官聞其砥行礪
學延爲東四旗官學教習盡心訓誨子弟成才者
頗眾復授前職充印務章京洊陞防禦佐領嘉慶

七年惠州永安縣會匪倡亂制軍吉慶移咨將軍
於旗營中揀選才武幹練之員速赴惠郡聽候委
派管帶各路兵勇將軍書敬卽派廣德偕協領全
甯防禦馬世安陳廷祚四員各帶親軍數名兼程
赴惠謁見制軍提督廣德獨見優禮次年銷差旋
省將會匪及各營情形面稟將軍厯厯如繪將軍
深器許之旣而逆首成擒特加薦舉十年陞任鑲
白正藍旗協領振廢起衰整齊行伍馬匹務令強
健器械務令堅利於滿漢官學則躬親誘掖時旗
童文試甫開建置義學延聘番禺名宿鄭南樵訓
課子弟其二子文通文慶亦令受學未幾俱入郡

庠滿營文教實廣德啟之也在任十三年考終於
官子四文達官協領文魁官佐領文通文興俱官
防禦孫承霖官佐領承恩承聯承惠俱官協領承
泰由繙譯進士官戶部主事承衡由繙譯舉人官
防禦一門鼎貴駐防旗人稱最盛焉

文明滿洲鑲白旗人嘉慶八年任鑲黃正白旗滿
洲協領鑲黃旗境在歸德大街市肆駢集旗民交
易每生事端乃派查事官兵數人常川在交衢官
堆巡守遇有旗民互爭立即拏究在任十載兩旗
人皆安靜舖民敬若神明先是八旗孀婦請旌者
印務司員拘於禮部條例必撫孤養親兼備者始

許報部請旌時正白旗有故兵順安之妻富察氏
少年守節已逾三十載未得請旌乃具稟將軍請
報部建坊及部覆准行滿漢八旗節婦先後呈請
旌表者十餘家事始於嘉慶十年實文明之力也
在任十一載卒於官長子興麟文生員次子兆麟
恩貢生成以文行顯

達興阿協領松福長子也少承家訓蹈矩循規待
人處事甚寬厚其子姪偶好嬉遊惰於學業則痛
懲之手書

聖諭廣訓訓子弟以禁非爲一條滿漢合璧恭懸堂上傳
知遵守門內孩童幼女無敢稍越禮法道光元年

任正黃正紅旗協領治軍一如教子不濫事鞭撻而兵丁皆感德服教時理事同知英吉乃京旗本族五服內從孫也管理八旗糧務而永豐倉所收各州縣額解兵米不堪食將軍弘善飭令更換惟東莞縣額解最多縣令懇同知轉求關照先送多金爲禮達興阿怒斥之曰此八旗養命之需子豈以一己之私觸憲怒而招羣怨耶此事萬不能爲力由是各州縣更解額米皆圓淨可殮沒後少子舒倫亦官正黃正紅旗協領

烏郎阿鑲白正藍旗協領松福次子正黃正紅旗協領達興阿之弟也精明幹練不畏強禦初官鑲

黃旗驍騎校時境內西華里有無賴閑散憑藉上
臺家丁聲勢糾合同民私鑄小錢莫敢過問烏郎
阿乘夜率壯士數十人破扉而入人贓並獲有持
多金以居閑者有稱聲勢以阻之者卒不爲動以
其事白諸當路照例懲辦道光九年任鑲黃正白
旗協領時有南海縣差役麥金者所爲多不法恆
懼拏問因僞居旗境玉華坊以重貲來餽冀爲之
庇却弗受未幾巡撫朱桂楨訪拏該犯卽命旗兵
捉解置之法後數年卒於任

倭陞額滿洲正藍旗人嘉慶十一年由防禦奉差
往南雄迎新任將軍賽沖阿隨

奏帶赴臺灣辦理軍務委充行營總管一切文移軍報悉付裁奪施行在臺半載事無大小到卽批判將軍深倚任之師撤敘功加二級卽補佐領十九年陞任鑲紅鑲藍旗協領總辦印務事件兼掌左司關防自厯南征益詳究經史政暇手不釋卷尤敬禮文士嘗謂左司外郎樊圻古元德曰前在臺營接奉

諭旨內有此次用兵海島須埋根進剿勿遺餘孽之語當時捧讀不識埋根二字作何解說後問隨員同知蔡聯桂乃知埋根者猶云澈底語出李延壽北史始歎史傳不可不讀也蒞政十餘載決疑定計有

益於旗眾者不勝指數而於學校栽培人才尤加
意焉

關祥原名玉貴後改今名嘉慶十一年由甲兵隨
印務章京往南雄迎接新任將軍賽沖阿舟返保
昌將軍奉

旨赴臺灣搜剿洋匪卽率來迎官兵十五員名馳赴漳州
渡臺接辦軍務每令關祥執令箭監斬逆匪久之
忽謂同伴曰吾初監斬魂驚骨慄今且以爲常事
吾之良心恐漸失矣由是持齋念佛以慈悲救人
爲務見流離難民必傾囊贈之人笑其迂呼爲玉
大師云凱撤敘功補驍騎校二十餘載遞遷至鑲

紅鑲藍旗滿洲協領每閱操演必戒眾兵以敦行
孝弟勤修武備謂此邦海氛漸惡民氣日驕不越
一紀必有事也道光十四年卒於官後果如其言
文達字霞亭協領廣德長子也嘉慶七年由印務
筆帖式從戎惠州辦理章奏以勤敏著稱歷任將
軍知其才遞擢至鑲黃正白旗協領在印務二十
餘年諳練政務初握協領篆時兩旗遇有公用無
項可支首先倡捐俸銀置產招租以充旗內公費
尤加意學校栽培後進每遇疑難卽與其弟佐領
文魁防禦交通文興悉心商酌務期得當而後已
年六十餘以疾乞休越二年卒子七承霖承恩承

聯承祥承泰承啟承衡

阿勒精阿滿洲鑲白旗人由京旗世管佐領陞補
廣州駐防鑲白正藍旗協領道光辛丑海氛不靖
省城戒嚴派領滿兵扼守小南門一日有廣勇領
餉者爲楚勇所奪時參贊大臣楊芳設行臺於貢
院楚勇亦在貢院屯紮廣勇譁然各執軍械擁入
貢院勢甚急阿勒精阿聞之卽率兵屯聚東西轅
門以過來者且燃槍以待參贊親出撫慰犒以金
錢並摘統隊官頂戴廣勇始散而阿勒精阿已縛
得凶勇二名獻於參贊交縣懲辦參贊謝之曰今
日微君大亂成矣力薦於將軍列諸薦剡未幾卒

喀勒春滿洲正紅旗人嘉慶十一年由前鋒隨將軍賽沖阿征臺灣爲護衛親軍立有戰功凱旋後保陞驍騎校洊擢至鑲紅鑲藍旗協領掌將軍印務及左司關防道光辛丑之役統帶滿漢官兵防守東南城而東南一帶舊屬廣協兵弁防守且有湘軍屯紮驟添旗旅大覺紛擾乃稟請將軍將協標兵及湘勇全行撤退專用旗兵防守事定後復稟明將軍自後仍用八旗兵分守全城若與綠營混雜一有變亂號令不一所關匪細惟是城大兵單不敷防守乃議裁汰馬匹

奏添無米礮兵四百名以資守禦將軍薨之後

奏准施行

格綳額正藍旗滿洲武舉道光辛丑之役靖逆將軍奕山選充大礮手事平敘功

賞戴藍翎後因沿海諸省大修邊防浙江巡撫移咨粵省請添鑄五六千觔大礮三十箇派旗營熟悉燃放之兵由驛運解赴浙以備防堵將軍奕湘知格綳額精於燃礮派令管帶礮兵八人運礮赴浙教習軍士差旋擢驍騎校厯陞防禦佐領咸豐四年紅匪擾及省城奉派帶兵晝戰夜守七月十八日與賊戰於北郊山雨大作士卒奔避賊傾巢而出格綳額督親軍一隊阻截山口燃槍斃賊甚多大隊

得還事定論功

賞換花翎以協領陞用尋除正黃正紅旗協領未幾卒於任

舒倫協領達興阿少子也長身偉貌以善射稱初由前鋒擢至鑲黃旗防禦咸豐四年紅匪事起六月二十四二十六等日賊眾疊犯城北永康礮臺爭踞飛鵝嶺冀作下壓之勢又有別股分犯西村以相牽制舒倫領旗勇二百名奮力西截賊殊死戰將趨西關適各路兵勇齊至會合分三路繞田塍以進賊爲西關汎弁黃賢彪所敗我三路軍槍礮齊發賊斃遍野餘皆逃遁後賊平敘功保

奏以佐領補用並

賞戴花翎旋陞任正黃正紅旗協領兩世同蒞一官人以爲八旗中之盛事云

承聯字西樓協領文達第三子也性聰敏有才幹弱冠出筆帖式在印務處行走政務最稱諳練官防禦時值咸豐四年之亂將軍穆特恩遇事悉以詢之令兼管團練局火箭廠事務事平錄功

奏請

賞戴花翎七年洋人旣入省垣次年兩廣總督黃宗漢至粵駐節惠郡將軍穆克德訥命承聯往見之告以省垣一切情形贊成和議同治三年陞補鑲黃正

白旗協領勇於任事惜未滿一任而卒生平尤以造就人才爲務嘗捐刻滿漢四書及清文啟蒙以嘉惠後學辛亥科繙譯鄉試胞弟承泰承衡同領鄉薦承泰聯捷成進士皆其力也

承惠字慕僑協領廣德之孫防禦文興第三子也少聰穎有膂力便弓馬由前鋒中道光丁酉科武舉辛丑之役靖逆將軍奕山選充隊長有戰績

奏請

賞戴藍翎旋擢驍騎校遷防禦副都統烏蘭泰知其曾歷戎行與講求練兵及攻戰之法甚異之咸豐元年粵西髮賊事起

上命烏蘭泰馳赴勦賊隨往管帶親軍新墟之戰斬馘甚眾

奏請

賞換花翎二年烏蘭泰追賊戰於將軍橋中槍丸落馬承惠背負之回營傷重遂卒乃率親兵護其柩回東督帥彙先後戰功

奏請以佐領陞用四年土寇事起攻撲省垣領兵出隊與賊戰屢敗之六年補佐領值邊釁復起分守西南城事解擢鑲紅鑲藍旗協領將軍瑞麟蒞任保舉堪用綠營副將得

旨記名以副將用同治五年任滿入都引

見復交軍機處記名十年今將軍長善以其才幹明敏履著勞績爲旗營中出色之員

奏請專改以副都統記名簡放並

賞加二品頂戴十一年軍政復薦舉卓異光緒二年奉旨來京

召見

皇太后垂詢昔年軍事近時旗務

奏對甚悉是年調補鑲黃正白旗協領三年二月

奏署廣州滿洲副都統四月回任七月軍政再膺卓異以積勞成疾未幾卒承惠厯官數十年實心任事潔己奉公撫馭兵丁有方沒之日八旗皆爲惋

惜焉

光緒十年續修補滿洲協領傳

伊勒哈春字澄之原任正黃正紅旗協領達興阿之孫舒倫之姪也狀貌英偉膂力過人道光丙午科由馬甲中武舉年尙未冠旋補本旗領催咸豐元年隨副都統烏蘭泰往剿粵西髮逆戰於新墟折馘甚衆

奏請以驍騎校補用並

賞戴藍翎四年粵東紅匪事起剿賊北郊大小四十餘戰奮勇先登殺賊多名身受重傷一次六年拔補本旗驍騎校擢陞防禦同治三四年間剿辦江閩竄匪攻克福建之武平永定詔安及廣東之長樂平

遠鎮平和平嘉應各城俱在事有功經總督瑞麟
巡撫蔣益澧保

奏

賞換花翎七年陞補正白旗佐領管理印務九年將軍長
善專摺

奏補正黃正紅旗協領一門三世同莅此官爲八旗
前此所未有才具明敏撫馭有方十一年

奏調鑲白正藍旗協領振興文教鼓勵戎行兵丁咸
知檢束旗廟官街有塌壞處咸自捐俸修葺掌左
司關防並管前鋒營技藝訓練精勤生平敦崇儉
樸八旗兵丁侈靡者痛懲之勤儉者禮重之家居

訓誨子弟諄諄以勿事嬉遊致荒學業爲戒伊祖
曾手書

聖諭廣訓訓子弟以禁非爲一條恭懸堂上終身恪守惟
恐有負先祖誥誡之苦心其立心行事概可知矣
光緒三年入都述職

皇太后召見奏對詳明奉

旨交軍機處記名回任後數年以積勞成疾卒於官

駐粵八旗志卷十六終

駐粵八旗志卷十七目錄

人物志

漢軍八旗歷任協領列傳

李廷芳

王賢

王衡

陳佐聖

高登

王之蛟

申文貴

門可旌

蔣國柱

馬爾愈

彭希聖

寶士忠

南君旭

馬攀鳳

陳萬國

鄧之仁

朱 旼

王文敏

陳禧亮

楊茂春

舒九思

韓世傑

李承宗

張 韶

劉 源

宋起鳳

劉籍芳

葉集鳳

倪廣泰

樊長齡

鍾溥澤

董茂濟

陳其瀚

劉 贊

李 璋

楊承震

董明文

劉士英

孫濟源

張陞和

黃世藩

劉安堡

光緒十年續修漢軍協領列傳

王鎮雄

駐粵八旗志卷十七

李廷芳漢軍鑲黃旗人康熙二十一年由京旗三甲喇牛彖章京授駐防廣州鑲黃旗協領同新任鑲黃旗叅領王之蛟領頭隊官兵眷屬到廣時廢藩舊卒尙未盡撤駐防新兵猶未齊集廷芳等僑寓城南潮州叛鎮劉進忠餘黨劉斌等復據普甯潛通海寇鄭克塽肆擾高廉各路廣東僅一提五鎮而提督一人水陸兼轄勢難兼顧乃請將軍督撫規畫經久控制之策總督金光祖素知廷芳有才畧與將軍命偕佛山同知譚守智周巡廣郡察勘各汛要隘形勢繪圖貼說上議略云會垣負山

面海控制諸郡居中四應用馬隊處少用舟船處多尙藩時左右屯以總兵官藩下僅添設十二號哨船作爲省中哨探塘報之用方今新制水師提督移駐順德水師兩總兵一駐廣海一駐新安將軍標下雖曰四營皆係陸路別無水軍他郡有警軍標卽行赴援省垣存兵無幾又無舟師可用請卽軍標四營改爲水師兩營陸路兩營增添哨船十二水兵六百守備千把各一員歸軍標中軍統轄庶幾水陸可以兼顧將軍督撫善其議具

奏

詔如所請其後一切事宜廷芳之力爲多云後終於任歸

葬京都

王賢漢軍正白旗人康熙二十一年由京旗公中
佐領陞任廣州駐防正白旗協領時土賊黎化中
陳九鼎等倡亂連州勾聯楚賊四出焚掠地方官
飛書告急而奉調駐防之京軍至者未滿五百將
軍王永譽調軍標及廣順兩協綠旗兵千三百名
命賢同副將佟養謨薛成虎等往討賊眾踞大田
頭清水塘一帶險隘結砦築堡爲負隅計兩副將
領銳卒晝夜往攻阻於深溪峭壁半月未獲寸功
問計於賢賢曰吾自三江口泊船日已令人探明
賊巢層巒環繞前隔三溪知砦中賊眾數萬糧食

馬耳人方元 卷一 二
無多彼必赴近村各社購糴惟當令健卒四路分
伏擒獲奸細訊明各路出口以重兵扼之其幽僻
小徑或壘石或掘坎以斷之不旬日可全股擒獲
也乃如其策未三日賊果傾巢而出投仗乞降焉
於是燔巢夷壘召民墾佃全境蕩平將軍據實保
奏奉

旨加級紀錄在任候陞尋卒於官

王衡漢軍鑲白旗人康熙二十一年由本旗驍騎
校陞授廣州駐防鑲白旗防禦次年攜眷到廣旋
遷補本旗叅領時從化增城營縣稟請官軍剿捕
花山巢寇將軍命副都統拜音達禮率師剿之令

衡督隊甫抵橫潭有鄉老數十人跪於馬前訴禍
亂之由副都統仍欲進兵衡曰適聞父老言此皆
乏食流民爲迫死計耳奈何竭兵力以盡殺爭功
請令村人前導衡願入山諭之於是令偕一營弁
往次日率百數十人餉餉軍門僉稱前因世亂年
荒流亡至此種芋植薯以濟殘生而土豪營兵目
爲叛賊率眾圍殺不得已斬竿磔石以相拒耳副
都統察其情真許招降免死於是花山前後六十
三巢寇遂平衡膺保薦陞任鑲白旗協領後遂於
花山增設花縣焉

陳佐聖字君弼漢軍正黃旗人初由甲喇章京以

才器舉卓異康熙二十一年擢駐防廣州正黃旗
協領時廢藩餘卒尙踞內城滋擾多端佐聖嫺於
吏治尤善撫民嚴輯旗兵驅逐豪卒有張世序者
尤強暴有司未敢過問佐聖率兵往擒之並拘致
其黨二十餘人送法司懲辦世序遂斃於獄餘黨
悉遞回原籍居民遂安四十一年隨副都統汪世
臣赴連陽蕩定八排徭匪得頭等功牌晉秩二級
佐聖性和藹撫御多恩然兵士有恃強訛索人民
者立置重法以故四民深感其德呼爲生佛云四
十八年八月卒於任居民罷市往哭及歸葬京都
送者填塞道途領催王日勲等建祠肖像祀之同

官馬爾愈題額曰遺愛

高登字遜峯漢軍鑲紅旗人康熙二十一年任駐防廣州鑲紅旗協領旗境在城西北隅兵燹之後半皆榛荆茂草登請領公項修立兵房旗眾始得棲止騎射之外尤工書法今城內寺觀門榜尙多其手書後卒於任歸葬海州

王之蛟字解生漢軍鑲黃旗人世襲拜塔喇布勒哈番康熙二十一年由京旗系領擢廣州駐防協領管理印房及右司事務將軍委令勘定旗民分界地趾先是西門外近郊一里地名桃源向爲廢藩養馬官地藩下廝養竊典於民蓋造房屋之蛟

按籍察出而事已經久難概令拆毀遂請於將軍
令按戶交納地租城內北自三元宮東至小北門
附近城闕一帶皆屬旗境其居民蓋有房閒者亦
概令交納地租以充公用從之公餘多暇嘗完葺
東郊前明尙書陳子壯舊墅與粵中諸名士觴詠
其閒又其側有武廟命工鑄銅鐘一鼎一郡人陳
恭尹屈大均梁佩蘭各爲之銘甚工三人皆詩人
號爲嶺南三大家者亦承平佳話也之蛟終老於
任子林承襲世職次子祖官叅領工詩能文著有
東海堂詩集四卷考古錄八卷

申文貴字任之號峴山漢軍正黃旗人康熙四十

一年以驍騎校隨副都統汪世臣征連州八排猺
匪冒雨攻砦爲礮石所傷賞頭等功牌凱旋後游
陞本旗叅領掌理左司刑名有鑲藍旗李某者豪
於財一奴曰李四兒以積憾殺李少子誣係雇工
人行兇並控其鄰人知情累讞莫決文貴使人潛
訪李某使婦具得其實當堂立訊四兒遂服置之
法被釋者十餘人雍正四年廣州大飢總督孔毓
珣開倉賑濟飢民紛集委文貴彈壓值糧廠被焚
文貴率兵撲救左足爲壞椽所傷遂不良於行乃
請老築別墅於粵秀山之陽建一堂曰退思集名
流唱酬於其閒乾隆四年六月朔卒軍民就其居

宅祀之額曰峴山祠在今大市街五仙觀南

門可旌漢軍正紅旗人世襲一等阿達哈哈番兼一拖沙拉哈番康熙中分撥駐防廣州補授正紅旗叅領頗有才具充當將軍印務章京時印房所用書吏皆廣州人恃其文案習熟舞弊多端可旌請選八旗領催甲兵通曉文墨者入掌稿案又擇子弟文秀者令入印房學習辦理文案可旌躬爲校閱隨事指示不數年印房遂裁去書吏皆令外郎管理至今不改後擢任正紅旗協領尋卒

蔣國柱漢軍正黃旗人康熙二十一年由叅領任廣州駐防協領京軍初至恐耽安逸漸事嬉遊乃

於署西置射圃日引兵眾習射其閒又令各甲喇置書塾以教子弟在任九載卒

馬爾愈漢軍鑲藍旗人世襲拜他拉布勒哈番任本旗叅領康熙二十一年奉調駐廣後兼攝協領事時各州縣繳廢藩時大小礮將軍拜音達禮命爾愈於東郊牧場逐一演試畢分置城垣及沿海礮臺厥後春秋兩季操礮皆命爾愈領礮手兵分赴校場演放如是者二十餘年後陞任協領有軍士赴江口購辦芻茭與民爭訐成訟經年弗解爾愈屬有司伸民抑軍事始罷眾詢厥故爾愈曰前時逆藩苛暴粵民憤怨故聞操北音者輒怒於心

此爭鬪之由也此時姑無論曲直惟先抑我軍彼民具有天良自當知愧汝輩能體吾意行之兵民和睦何從起釁此永遠相安之道也眾皆服其言後卒於任

彭希聖漢軍正藍旗人由叅領來粵駐防擢正藍旗協領粵省旗民同城乃請於將軍副都統由歸德門至大北門街西添置官堆八令官兵晝夜巡守遇有旗民交爭事故小則彈壓大則捕治其街西房屋任租賃於民開設店肆俾通貿易由是商販駢集繁盛倍前月收地租統存右司庫以備公費於是兵無公攤月扣之累雍正初卒於官

寶士忠漢軍鑲藍旗人由協領來粵駐防時年六十餘性慈惠好施戚族窘乏者遇婚喪盡力賙恤置官轎凶肆廉定價值以便各兵先是廢藩時有巡山之令每冬季民田收穫既畢令官兵二三百名周巡村莊以防奸宄不無滋擾至是猶循故事士忠乃請改巡山之令於仲冬燕塘演礮時令軍士在礮營處日行圍一二次以習勞肄武不必遠出從之南北遷徙旗人無家廟薦享歲時惟祭於寢士忠乃置寶氏家廟於城東高華里堂廡寢室畢具以時封牲奠醴率子孫行禮焉

南君旭字熙耀漢軍鑲紅旗人襲騎都尉世職雍

正七年由叅領擢廣州鑲紅旗協領兼掌右司印
鑰適值重修南海學將軍委令清丈廢藩時所占
學宮地基按原址圖冊歸還其餘地復添設兵房
二百餘間南海令魏綰率紳士詣謝焉在任九載
丁內艱請咨回京旗

馬攀鳳漢軍鑲黃旗人初由甲兵從征排徭游擢
至鑲黃旗協領前官虧短公項弗忍舉發乃代爲
完補焉時旗人往往有指腹爲婚者攀鳳曰此陋
俗也例有明禁且異時貧富不均必有悔婚之事
乃嚴禁之後凡嫁娶之家必於先一月遞定親單
各該管官存案檔房屆期始許具報領賞乾隆四

年卒於任年七十餘

陳萬國漢軍鑲白旗人康熙中由世管佐領擢駐防廣州鑲白旗協領掌理印務將軍遇事諮之直陳無隱有不可者侃侃力爭將軍以其詞直輒曲意從焉巡撫年希堯其姻戚也在任三載未嘗干以私嘉慶戊寅武舉正藍旗記名佐領陳貴道光丁酉科舉人順天通州學正陳良玉皆其後也

鄧之仁字長人漢軍鑲白旗人康熙五十三年擢廣州駐防叅領後陞補協領有父訴子不循管教在外滋事者之仁悚然曰此長官失教之過乃集眾命其子至前剴切訓諭歷述古今孝子順孫故

事言未畢父子皆垂涕知悔之仁又自撰簡明條教語每朔望集眾宣講

聖諭廣訓外更令外郎將條教語講說歿之日闔旗老幼數百人咸往哭焉

朱祝字明山漢軍正紅旗人世管佐領康熙二十一年來粵駐防洊擢至正紅旗協領善射發必命中旗境光塔街有懷聖寺明季回民聚居其左右恆有外來回民入寺掃塔講經衍教坊鄰惡其雜沓鳴於官請驅逐之並封禁塔院以爲夷俗邪教恐生他患祝曰回民自前代已入中國散居各處今天下無處無回民第戒其寺內無得收納外人

足矣何必過慮耶時城外南勝里諸回民間有驅逐封寺之議方欲糾眾爲難聞脫言乃止由是華回相安至今無異焉

王文敏漢軍正紅旗人頗有膂力由武舉陞驍騎校擢駐防廣州正黃旗防禦乾隆元年以卓異擢補叅領三年擢正黃旗協領管前鋒營技藝選軍丁健壯者三百名復選布庫十名日分班教習立限考較並立賞罰之法後值大閱之期總督瑪爾泰奉

寄諭查閱八旗營伍後將情形

奏

馬興人方云 卷一十
聞瑪爾泰見旗營騎射精強特保文敏訓練之功奉
旨嘉獎在任候陞後年八十餘猶貌如童顏云

陳禧亮漢軍正藍旗人雍正五年由驍騎校擢防
禦來粵乾隆六年陞補本旗叅領其訓兵以勤儉
爲本自啟家塾課其子弟凡旗中子弟俱令來學
十三年陞任正白旗協領每舉四子書謂其下曰
吾輩事君事長使眾之道皆備於此能身體力行
卽爲聖賢不難否則爲臣爲子亦多闕陷也藩司
託穆齊圖聞其賢特往拜之與訂交焉在任九載
以卓異入都卒於旅次

楊茂春字蔭庭漢軍鑲黃旗人世管佐領充當印

務章京乾隆二十九年奉調來廣次年陞補鑲白
正藍旗協領三十三年兵部來文以將軍專轄旗
兵其標下綠旗官兵歸總督提督統轄將軍集眾
會議茂春謂原設軍標四營每營有旗丁百名充
當戰兵今裁撤歸旗既無養贍之資人才亦甚可
惜請仿江甯駐防添一步營以此旗丁充之遇布
陣時用刀牌以護槍礮執長矛以備衝鋒庶可兩
得將軍增海因疏請以漢軍馬甲二百缺改爲步
甲四百名別爲一營曰步軍以協領統之皆本茂
春之規畫也後以年老乞休尋卒

舒九思字貫中漢軍鑲黃旗人通滿漢文雍正十

三年由驍騎校擢正白旗防禦充右司司員乾隆
十九年擢鑲黃旗協領會

廷議裁廣州漢軍兵之半以京旗滿洲兵千五百名
補之人心無不惶恐九思晝夜籌畫請於將軍單
戶者留戶戶口多者遣半所遣文弱者俾充稅關
書役強壯者令入綠營充伍其有願他徙者概予
行資於是人心帖然迨滿洲兵至復爲分定居址
地界由是滿漢合駐絕無新舊之嫌焉是年改補
鑲黃正白旗協領仍掌右司關防後以失察右司
屬員事落職旋卒子和由廣州協領陞任直隸河
閒協副將有傳

韓世傑漢軍正白旗人父先春以叅領來粵駐防世傑由印務章京擢陞佐領時大學士忠勇公傅恆提陝甘川楚兵征緬甸檄調閩浙兩廣戰馬萬匹解赴軍營世傑奉委押馬六百匹赴永昌山嶺崎嶇備極勞險比達大營馬匹羸瘦軍吏拒而弗受責令餒養臙壯是時世傑得疾憊甚復力疾督軍士加意芻秣又月餘始收納焉反粵未幾陞補鑲黃正白旗協領兼理左司操防嘗以前明戚繼光之言謂操兵之法美觀則不可用可用則不美觀最爲的確故於操演必講求實際其走陣越隊諸舊法一切廢去將軍楊甯深以爲然在任數年

卒

李承宗字受之漢軍正藍旗人乾隆三十一年任
鑲紅鑲藍旗協領時承平日久旗人漸染奢華承
宗見兵丁有服紈綺者立命褫去見提壺沽酒者
立碎其壺見攜籠養鳥者拆籠立放其鳥復加鞭
責焉其或有羣飲聚博者尤痛懲弗貸又定兩課
法兵丁於值班應役之暇日於巳刻赴箭道練習
走隊行陣之式申刻始罷爲午課黃昏後分赴官
弓房習本身技藝兼教以

國語二鼓始散爲晚課一弗到者罰令長跪再則懲
責三則降革承宗便服親臨寒暑無閒有事卽於

其閒裁決或謂太煩且請其節勞則曰吾不以身
先之何以服眾凡人勞則善心生逸則妄念萌渠
輩今日怨我異時思我耳由是兩旗兵士莫不畏
威服教焉

張韜漢軍鑲白旗人乾隆三十二年由筆帖式改
補正白旗驍騎校四十一年洊擢至正黃正紅旗
協領掌印務凡二十年事無鉅細細規畫精詳歷任
將軍咸倚任之方初立步營時令隨同大隊操演
將軍命韜參定陣式韜乃博採京旗及綠營各陣
法增損變通殫兩月精思始繪成陣圖引領隊人
等親爲指示按圖演習凡兩閱月乃請將軍臨閱

大加稱賞焉後值大閱之年總督福康安考覈營伍最嚴將軍善德慮大隊槍音未能整齊命韜亟加操演未幾遂皆熟習及大閱日槍音截然至今操演大隊步營之規未能易也生平嚴於治軍動遵禮法凡子弟之俊秀者皆令讀書就學後引年乞休卒於家子朝稜官鑲黃旗防禦自有傳

劉源字始泉漢軍鑲黃旗人少時家貧力學及長通滿漢文考取印務候補筆帖式乾隆三十二年改補鑲白旗驍騎校充印務章京疊膺保薦四十八年擢任鑲白正藍旗協領精明強幹與張靜濟名時旗人有尙舉董健強嵩三人於南海縣署前

與縣差吳乾角口乾率眾與鬪三人皆有勇力乾弗能勝適木坊錢糧店伴負銀一囊過誤中拳傷額倒地事經街坊勸散而吳乾遂稱旗人尙舉糾眾劫餉傷人縣令據詞通詳將軍令該管官傳集三人交讞局審訊命源赴讞局監審問官逼令三人招承而尙舉三受重刑只供角口相關事實有之至劫餉實係被誣問官仍欲用刑鍛鍊源乃曰三人初供眾目所覩今不按街坊證見暨所供實情惟據縣差一面之詞欲故入重罪使三人死於桁楊之下耶眾官愕然乃稟復上憲據實結案焉後引年乞休家居手著家規以訓子孫子秉裕官

防禦孫士英曾孫安堡俱官協領安基官防禦

宋起鳳漢軍正黃旗人幼失怙恃依其從兄起龍
以生及長嫻於清語騎射遂得補官乾隆五十六
年任鑲紅鑲藍旗協領有惠政兩旗中有齒德者
每屆年節必親往問視所任協領署西有方塘畝
許內生蓮花特異常種起鳳欲窮其異命工掘之
甫數尺露一銅佛頂潤如巨釜亟命掩之厥後疊
遭妻子之喪戚友咸歸咎於掘池欲爲禱禳不聽
時惟餘第四子成福令寄養於起龍家後亦無恙
又數年起鳳乃卒於任年七十
劉籍芳號慎齋漢軍正白旗人長於

國語騎射乾隆五十二年由鑲白旗驍騎校隨副都統博清額征臺灣在事有功賞頭等功牌凱旋陞正白旗防禦嘉慶元年遷鑲黃旗佐領旋擢任鑲黃正白旗協領掌理將軍印務察閱八旗孤寡殘廢者現有二百九十八名皆無養贍資乃請將軍福昌與督撫議於糧道庫普濟堂經費款內分撥羨餘添設旗營孤貧錢糧每名口月支銀一兩奏入奉

旨允行後三載卒於官子四庶康庚庠皆以品學稱孫秉和今官正黃正紅旗協領

葉集鳳漢軍正藍旗人由驍騎校充印務章京游

馬耳方云 卷一十
擢至鑲紅鑲藍旗協領乾隆五十二年隨副都統
博清額統兵往征臺灣及抵彰化營於新墟與閩
將蔡攀龍魏大斌等前後立營蔡魏兩營兵時出
滋擾土民紛紛投訴獨葉營無之及破斗六門攻
大里棧奪小半天諸戰亦惟葉營兵最勇明年凱
撤集鳳得優敘焉

倪廣泰字充廷漢軍正藍旗人乾隆四十四年由
領催拔補鑲白旗驍騎校嘉慶五年歷擢至正黃
正紅旗協領時永豐倉屯儲旗米各州縣額解未
能一色厥丁斗級復憑藉爲奸米多霉變斛復不
足眾兵苦之廣泰悉其弊稟請將軍札理事同知

預日呈遞俸米兵米樣色及厥口次第每月定於
初二日鑲黃旗支領初三日正黃旗支領以次遞
排至初十日水師旗營支領委員監放不如樣色
卽另開別厥以乾圓潔齊爲準於是數十年積弊
一旦革除焉又凡兩旗之貧乏無告者年終按名
籌給度歲銀一兩後引年告休

樊長齡漢軍鑲黃旗人乾隆五十二年以甲兵從
征臺灣每戰奮勇爭先身疊受傷仍裹創力戰凱
旋拔補驍騎校累遷至鑲紅鑲藍旗協領兩旗地
近北門城外土人結聯回民宰牛聚賭旗丁亦有
三五無賴者溷處其間長齡察知之用竹籤書其

姓名置筒中隨時掣籤點卯誤卽責懲不貸於是
無賴者遂皆歛迹生平嚴於治兵又精造辦軍器
鳥槍刀牌戈矛諸械自爲樣式選工製造俱極精
良在任二十六年引年乞休又數年乃卒

鍾溥澤字遠敷漢軍正藍旗人乾隆五十二年由
甲兵從征臺灣歸補領催充印務處稿案外郎將
軍存泰聞其長於滿文令面擬奏稿呈閱一字不
易而馬射又精遂拔補驍騎校嘉慶十一年歷擢
至正黃正紅旗協領任事勤敏尤以表示風俗爲
先時管下兵丁有官世綱者未娶病故其聘妻范
氏聞訃奔喪守節甲喇領催官向未經見未許稟

報溥澤聞之曰節孝爲風化所關女子能知節義此至難能者卽令具稿稟報後范氏得建坊旌表在任十年事簡令行眾皆悅服後以重聽乞休子承武官防禦孫贊韶道光乙未領鄉薦選授直隸蠡縣教諭

董茂濟字廣仁漢軍正白旗人性和厚人有過失不直斥其非必引他人之過失相類者諄諄告戒俾知愧悟乾隆五十二年由領催從征臺灣次年凱旋補正藍旗驍騎校時八旗設立孩兒槍隊選幼小子弟學習各父兄多以爲難時茂濟子明文年未十歲乃先令學習演放由是各家皆令子弟

馬 方 言 卷 一
就學焉嘉慶七年由正藍旗佐領領兵赴永安堵
勦賊匪有功十一年陞任鑲白正藍旗協領嚴於
律已將軍嘗欲拔補其子馬甲茂濟以現尙有家
口眾多不敷養贍而人才可取者請先補之其公
正類如此二十四年再滿任時年七十一將具牘
乞休三旗弁兵聞之俱赴署求再留一任乃請咨
入都既至因病呈請兵部代

奏以原品休致歸粵後又數年乃卒年七十九子明
文後官鑲紅鑲藍旗協領自有傳

陳其瀚字澹然漢軍鑲紅旗人以身武拔補正紅
旗驍騎校乾隆五十二年從征臺灣隨副都統博

清額搜勦逆匪克復鳳山多所斬馘經大帥巢保
奉

旨賞給功牌二凱旋管押軍裝內渡舟至澎湖突遭颶風
舟危甚其瀚急揮刀斷桅久之乃定而軍裝沒於
巨浸者數十回粵據實以報得免議明年遷防禦
洊陞鑲黃正白旗協領每恨自少失學文案未能
通曉力勸兩旗子弟就學能者優加獎異在任六
載引年乞休以軍功得食全俸家居二十四年年
八十餘乃卒子廣文武庠生因軍功保舉驍騎校
藍翎

劉贊字佐猷原名溥漢軍正白旗人父秉璋官驍

騎校贊幼孤其叔秉琨撫育之及長體幹脩偉尤
嫻騎射乾隆丁未由馬甲從征臺灣以奮勇稱凱
撤後值大閱之期與射疊中五矢制軍優獎記名
次年由領催擢補鑲黃旗驍騎校洊陞鑲黃旗防
禦正藍旗佐領旗中子弟年七歲以上者悉令入
官學讀書十五歲以上則令兼入官弓房習射道
光甲申陞任鑲紅鑲藍旗協領乃闢署西隙地營
書舍延師教其子讀書而旗中之聰俊子弟亦得
附學焉年踰六旬引疾乞休得食半俸年八十餘
乃終子承緣道光己亥科舉人廣西天寶縣知縣
自有傳承綬今官水師旗營左翼佐領

李璋字奉端漢軍正白旗人有文武才以馬甲掌
滿洲副都統書記臺灣永安之役咸在事有功積
勞補鑲白旗驍騎校歷擢至鑲紅鑲藍旗協領兩
旗素號難治璋一處以至公嘗有圉人牧馬北郊
馬逸踐人田禾耕者羣起而執其馬以償禾價城
門守弁往索不與遂張大其詞謂豪惡聚眾毆官
搶馬將聞諸將軍璋止之命曉事兵數人入村見
父老以善言開導且謂事聞上官非爾村民之福
於是耕者交還官馬懇求息訟焉璋乃諭眾曰兵
所以守土防城民則力田充餉兩本相需何分畛
域且兵民不和患之大者也今後敢因口角徭嫌

恃強毆人者必重繩以法由是不復有旗民鬪毆之事在任數載引年乞休子凌雲孫逢春俱入郡庠

楊承震字均聞漢軍正黃旗人體貌魁偉膂力勝人而愛好文學於滿漢文字均能通曉年二十餘由領催充當副都統書記嘉慶二年隨滿洲副都統和興額往廣西泗城府會勦貴州逆苗石柳鄧之亂戰於龍洞奮勇當先斬賊三級復奪得賊馬一騎克復阿稿寨得賞頭等功牌是年冬苗疆平凱撤回廣拔補驍騎校洊擢至正黃正紅旗協領後兩次任滿入都引

見均交軍機處記名前後在任十八年以寬仁率眾而士卒有飲博遊惰者則痛治之居家尤能睦族黨恤孤寡弟承雯官防禦終身相友愛年六十餘卒於官子萼諸生

董明文字鑑洲協領董茂濟長子幼承家訓嫻習滿漢文藝兼精騎射拳勇年二十餘由甲兵充將軍印務外郎嘉慶十一年奉差往南雄接新任將軍賽沖阿隨於途次

奏帶赴臺灣搜勦洋匪是年八月渡臺留於營內辦理摺奏文移事件十二月又隨同官兵搜勦各處匪匪擒獲多名敘功保

奏奉

旨賞給驍騎校頂戴回營儘先拔補明年凱撤回廣拔補
鑲白旗驍騎校歷擢至鑲紅鑲藍旗協領掌理將
軍印務二十餘年一切政務咸賴經理道光二十
一年洋人潛踞永康礮臺督兵親冒礮火與之接
仗左副都統裕瑞稱其謀勇兼備事定後首錄其
防城功保薦奉

旨賞戴花翎而善後城防軍火事宜悉令裁酌施行年逾
六旬積勞成疾卒於任子長庚今官鑲白旗驍騎
校

劉士英字芝巖協領劉源之孫防禦劉秉裕長子

也嗜學能文兼精騎射在將軍印務行走由馬甲
厯擢至鑲黃旗佐領將軍蘇勒芳阿尤器重之遇
事每相諮訪道光中粵東民紳有叩

閤訟案

欽差侍郎朱士彥來粵會同將軍蘇勒芳阿察訊將軍特
令士英入獄局辦理文案時八旗餘丁眾多別無
贍生之計士英因請將軍

奏提藩庫所存八旗馬價銀一萬兩發商生息添設
八旗餘兵一百名以資養贍奉

旨允准後陞任鑲白正藍旗協領設立八旗備戰營以備
調遣辛丑之役領兵固守南城礮九日從肩背閒

轟擊絕不退避嚴巡垣陴晝夜罔懈事定後將軍參贊方擬保薦而積勞過甚一病不起年甫五十餘子安基後官防禦咸豐二年卒於廣西軍營

孫濟源字雨澤漢軍正黃旗人由領催補驍騎校洊陞鑲白正藍旗協領在任十年公正無私有鐵面之稱道光末八旗倉米積弊日深既不能如期散放而且米質黑腐加以攙沙灌水旗兵深以爲苦歲已酉秋濟源任滿入都引

見瀕行懇請將軍穆特恩釐剔倉弊嚴催督糧道及理事同知如期散放兵米以濟旗眾將軍感其誠遂與督撫商定每俸米一石折銀二兩二錢兵米一石

折銀一兩七錢按月開放由是倉蠹之患遂除八旗至今賴之濟源引

見後仍回原任咸豐元年其子湛以馬甲隨副都統烏蘭泰勦廣西土匪陣亡逾年濟源亦卒於官

張陞和漢軍正白旗人由繙譯官學生考取隨印外郎在將軍印務司理文案以勤能補鑲白旗驍騎校道光辛丑之役帶兵隨湖南副將戴昌屯江潯之離明觀力戰有功保

賞藍翎咸豐初洊擢至鑲白正藍旗協領四年土匪事起統帶漢軍八旗備戰兵出戰北郊屢挫賊鋒六年洋人攻擊省垣督兵守東城年餘弗懈七年十月

總督葉名琛命撤去守城旗兵大半以節省經費十一月十三日洋人忽賺入省河盡力攻擊一晝夜開城無完堞士卒飢凍無備陞和躬爲撫循十四日辰刻洋人從城堞轟塌處紛紛登城槍丸如密雨旗兵拒戰死者枕籍陞和揮刀殺數人力竭亦被害事

聞賞雲騎尉世職入祀昭忠祠

黃世藩字侯屏漢軍正黃旗人道光十三年由領催補本旗驍騎校十八年陞鑲藍旗防禦辛丑之役防守北城四月初五日率兵出北郊迎戰殺賊二名靖逆將軍奕山保

奏以應陞之缺用二十三年擢陞鑲紅旗佐領咸豐四年紅匪事起奉委領兵駐劄西路王聖塘鄉堵禦隨又奉調協守永康礮臺累月攻勦北路賊巢事平敘功

賞戴花翎以協領補用是時近省各鄉村查辦從逆匪徒多所株連而王聖塘一鄉世藩曾領兵駐守見其無從逆形迹力爲保釋鄉人深感其德焉六年陞任正黃正紅旗協領援例捐輸

賞加副將銜七年十一月領兵守永康礮臺督戰受傷後二年卒於任

劉安堡字康侯協領劉源曾孫父士魁諸生有文

名早卒時安堡未十歲及長事母能曲意順承由
隨印外郎改補領催考驗驍騎校四旗領催再三
角射安堡連中十九矢後由鑲白旗驍騎校陞正
藍旗防禦充大關監稅委員監督恆祺倚任之咸
豐六年洋人攻擊省垣恆祺捐貲團練旗勇特委
安堡與防禦忠音監其事十一年遷鑲黃旗佐領
同治三年陞補鑲紅鑲藍旗協領整頓旗務安詳
穩慎十年今將軍長善獎勵旗員以安堡尤異

奏請

賞加二品頂戴體素羸弱加以勞瘁過甚十二年卒於任
年僅五十子煥棻皆列郡庠

光緒十年續修補漢軍協領傳

王鎮雄字秋臺漢軍鑲黃旗人水師旗營佐領王文耀之孫也姿性明敏讀書爲文有奇氣工楷法未弱冠補諸生兩試棘闈弗售旣而試高等有聲庠序閔充將軍印務外即熟悉文案兼嫻騎射遂由領催擢補正藍旗驍騎校爲印務章京旋擢陞正白旗防禦正藍旗佐領鑲黃正白旗協領總管將軍印務通達政體八旗公事咸資裁決咸豐壬子粵西髮逆站踞金陵軍營需員委用將軍穆特恩奉部文保送數員乃咨送鎮雄往金陵大營奉派督兵於朝陽太平神策聚寶諸門及雨花臺擊

賊次年歸粵適粵東紅匪蠢動勢甚洶湧穆將軍命統八旗馬步兵一千出城東防堵部署甫定而賊大至鎮雄整隊迎擊敗其中路大股其東路一股直撲永康礮臺復急率親兵橫擊之槍斃一執蘇賊餘悉鳥獸散時咸豐四年六月二十四日也自是移營駐守永康礮臺將軍命合原防臺官兵共一千三百名悉歸鎮雄統帶滿洲協領來存與之協守始終和衷共濟焉時各路兵勇俱未到二十六日賊復糾黨漫山遍野而來鎮雄令兵分三隊拒之接戰移時賊大敗去我軍奮勇直進追過分水基聞金聲仍不止鎮雄急執令箭飛馬追截

回營痛戒之七月二日城內官兵深入賊巢遇伏於牛欄岡傷亡數百人衆始服其先見初十日賊首何六由東莞率匪數萬至省悉力撲臺鎮雄率兵據飛鷺嶺鏖戰自辰至申賊至愈衆卒不得登山將軍令收隊回臺固守鎮雄以爲兵退則賊據嶺下壓勢如建瓴臺恐難守因請別調兵勇由東路衝出賊虞腹背受敵乃遁去十八日各路官兵擊賊於三家店戰方酣大雨如注槍礮不得施水漫不辨道路諸軍深入者死傷甚衆鎮雄收隊回臺嚴守賊乘順風冒雨大至乃令然放大礮連環擊之乃退入三三元里鎮雄料賊必乘夜雨奪臺乃

出夜戰火具分布四隅三更後賊目甘先果潛至臺下見臺上有備乃不敢進自是賊不復敢逼近礮臺我軍出隊亦不復深入相持數月賊氣稍衰鎮雄乃選立衝鋒隊百人連日出隊仍不令接戰至八月初十日在分水基與賊相持過午賊益懈鎮雄忽發令直進擊賊衝鋒隊踴躍奮迅無不一當百賊大驚潰各路兵勇繼進環攻賊望風披靡衆軍追過三家店斬殺無算軍威由此大振諸路兵勇排日合力進攻至九月十三日遂焚掃蕭岡及佛嶺市賊巢北郊於是肅清事平後將軍與制軍錄功合保奉

旨賞加副都統銜並

賞戴花翎六年九月洋人起釁晝夜施放飛礮攻城鎮雄
統兵駐守歸德門七年十月奉制軍令撤兵以節
餉洋人忽於十一月十三日在珠江盡力攻城一
晝夜間礮聲無一息之停東城塌陷無立足處十
四日天甫明洋衆卽由塌陷處登城站踞觀音山
斯時人心惶駭省中吏民遷徙一空鎮雄晝夜在
將軍署悉心安撫相機佈置旗境賴以安堵後爲
同文館提調累經將軍瑞麟長善保薦記名簡放
副都統兩次入都

召見

皇太后垂詢當時兵事

奏對明悉光緒三年二月

奏署廣州漢軍副都統四月回本任五年卒於官年
七十一子汝梅今官鑲黃旗佐領

駐粵八旗志卷十七終